
Кенг имкониятлар майдони

Фарғонадаги қулай инвестицион муҳит, иқтисодий зонада инвесторларга яратиладиган шароит ва имкониятлар вилоятимизда икки кун меҳмон бўлган корейлик ишбилармонлар эътиборини тортди.

Ишлаб чиқаришнинг турли йўналишлари бўйича имзоланган шартнома, меморандумлар, ўртага ташланган таклифлар, яхши ташаббуслар буни кўрсатиб турибди.

Фарғона вилояти ҳокими Шухрат Ғаниев қабулида бўлган Чанг Кён Ким раҳбарлигидаги делегация аъзолари дўстона алоқалар ва самимий қабул учун вилоят раҳбарига ўз миннатдорчиликларини билдирдилар.

– Масъул шахс сифатида Фарғонада эркин иқтисодий зона очилганлиги ҳақида корейлик бизнесменларга эълонлар бериб, инвестор, тадбиркорларга алоҳида тарғибот қилдик, – дейди “Evergreen Motors Group” компанияси президенти, делегация раҳбари Чанг Кён Ким. – Бу ҳақда хабар топган, тадбиркорлик ишларини амалга оширишга умид қилган юздан ортиқ бизнесменлар катта қизиқиш билан инвестиция киритиш учун Фарғонага келдилар. Ўзимиз эса Ўзбекистоннинг Жанубий Кореядаги фавқуллоҳ ва мухтор элчиси Виталий Фен таклиф ва тавсиялари билан Қўқонда “Hyundai” автомобиллари учун эҳтиёт қисмлар ишлаб чиқаришни йўлга қўйдик.

Вилоят ҳокимлигида корейлик тадбиркорларга “FERGANA CITY” халқаро бизнес марказидан ўрин олган мактаб, болалар боғчаси, маҳалла гузари, котежд, кўп қаватли турар жойлар, савдо ва маиший хизмат кўрсатиш комплекси, истироҳат боғининг лойиҳалари тўғрисида маълумотлар берилди. Делегация аъзолари киритилиши лозим бўлган инвестициялар ҳақида маълумотга эга бўлдилар.

Шу ўринда Фарғона шаҳрида рентген аппаратларини ишлаб чиқаришга ихтисослашган “Листен Фергана” Ўзбек-Корея қўшма корхонаси ташкил қилиниб, ҳозирги кунда қурилиш ишлари бошланганлигини таъкидлаш ўринли.

Вилоятимизда Корея тажрибаси асосида мактабгача таълим муассасалари очилади. Ушбу лойиҳаларни амалга оширишда қўшимча равишда ер майдонлари ва бино иншоотлари ажратилиши белгиланган.

Корейликларга янги туризм объектлари, меҳмонхона, транспорт-логистика марказлари ва янги инновацион лойиҳаларни амалга ошириш учун қўшимча сармоялар киритиш таклиф қилинди.

Мамлакатимизда изчиллик билан олиб борилаётган ислохотларнинг натижаси сифатида эркин иқтисодий ва кичик саноат зоналарининг ташкил этилиши Фарғонани янада ривожлантириш, аҳолини иш билан таъминлаш шароитини яратишда жуда муҳимдир.

Соҳиба АБДУРАҲМОНОВА,

“Фарғона ҳақиқати” махсус мухбири.

Суратни Шерзод ҚОРАБОЕВ олган.

2018-03-15 18:47:37